



Inatsisartut Ombudsmandiata 2021-imut ukiumoortumik nalunaarutaata Inatsisartunit tusaatissatut tiguneqarnissaanik Inatsisartut aalajangiiffigisassaattut siunnersuut.

(Inatsisinut ataatsimiititaliaq)

(Siullermeerneqarnera aappassaaneerneqarneralu)

Demokraatit Inasisartut Ombudsmandiat 2021-mi suliniarsimaneranut qutsavigaat. Ombudsmandeqarneq innuttaasut inatsisitigut pisinnaatitaaffiisa nukittorsartuarnissaanut oqartussaasullu suliaminnik naammassisaqartuarnissaannik qularnaveeqqutitupajaaq isigaat.

Uagutsinnut Ombudsmandeqarneq tamat oqartussaananeranut annertuumik ilaavoq, pingaartutullu isigaarput, innuttaasut naammagittaalliornissaminut tassunga periarfissaqarnerat.

Perusukkalarparpullu, naammagittaalliuutit ikinnerpaaffimmiinnissaat, taakku takuttarmassuk, pisortani sullissineq pitsaasumik ingerlasoq. Ajoraluartumilli nassuerutigisariaqarparput, sulii inuppassuaqarmat, naammagittaalliorariaqartartunik. Taakkulu ajoraluartumik takutippaat, kommunini sullissineq ilaatigut arriillunilu amigaateqartoq. Ajornartorsiutaavoq, oqallisigisariaqarparput iliuuseqarfialugulu.

2021-imi Ombudsmandeqarfik 196-nik naammagittaalliuutinik tigusaqarsimavoq, taakkunannga 190-sit innuttaasut naammagittaalliornerannik tungaveqartut. 2020-miit appariaallassimapput, kisitsisilli sulii, qaffasippallaarput. Pingaartumik ilanngukkaanni, sulii assanngortut affai sinnerlugit, Ombudsmandeqarfimmiit arlaatigut iliuuseqarfigineqartussaasimmata.

Inatsisartut tungaanniit sakkortuumik kommuninut erseqqissartariaqarparput, sullissineq pitsaanerulertariaqartoq sullarinnerusariaqartullu. Tassaniluuna innuttaasut inatsisitigut illersugaanerat pineqartoq.

Pingaartumik isornartuuvoq, sulii kommunit sullissinissamut inatsisip malinniarnissaanut ajornartorsiuteqarmata allakkatigut aalajangikkat nalunaarutigisarnissaannut, innuttaasut piimasaqaatigigaangassuk suliani, innuttaasut tamakkiisumik taperserseqarsimatinnagit. Tamannalu pisarluni naak, Ombudsmandip tamanna erseqqissartuaraluaruaa ukiuni arlaqartuni.

Ajornartorsiullu aamma saqqummerpoq Ombudsmandip misissuineratigut kommunit meeqqanit angerlarsimaffiup avataanut inissiisarnerat angerlartitsisarnerallu pillugit suliaanik ukatarinninneratigut, tamanut nalunaarutigineqartoq upernaanerani 2022-mi. Tassani atuarneqarsinnaavoq:

”Ombudsmandip kommunit sulianik meeqqanut tunngasunik ilungersunartunik pingaaruteqartunillu suliarinninnerminni ajornartorsiuteqarajuttarnerannik paasinninnera misissuinerup taassuma uppersarpaa. Ombudsmandip paasisaa aamma unaavoq kommunit sulii ilungersunartunik kukkussuteqartartut, kommunimmi paasissutissanik pissarsiniarnerminni misissuineruunniit meeqqap angerlarsimaffimmi avataanut inissinneqarneranut imaluunniit meeqqap inissinneqarsimasup



angerlartinneqarneranut atatillugu piumasaqaataasunik ingerlatsiniarnerminni ajornartorsiuteqarajuttarmata. Ombudsmandip misissuineq tunngavigalugu paasinninnera unaavoq kommunit aalajangiinerminnik suliami illua'tungiusunut allakkatigut nalunaarutinik suliaq 2022-1 Meeqqanik inissiisarneq angerlartitsisarnerlu pillugit sulianik misissuineq 5. maj 2022 All. nr./notatnr.: 2021-901-0002-18 Sull./sagsbeh.: AG/KJ/jh >> 2 rinnittannginnerat annertoourjussuusoq. Misissuinerup ilaatigut takutippaa sulianit inissiinernut tunngasunit 15-init misissorneqartunit suliani arfineq marlunni allakkatigut aalajangiinerit ilaatigut amigaataasut, sulianillu angerlartitsinernut tunngasunit 15-init suliani arfineq pingasuni allakkatigut aalajangiinerit amigaataasut. Ombudsmandi eqikkaalluni taamatuttaa inerniliivoq kommunit meeqqanik angerlarsimaffiup avataanut inissinneqarsimasunik angerlartitsinermut atatillugu inissiiviusup oqaaseqataanik pissarsiniangpallaartartut. Taamaalilluni sulianit angerlartitsinernut tunngasunit 15-init misissorneqartunit suliani arfineq pingasuni inissiiviusup oqaaseqataanik pissarsiniartoqarsimangilaq.”¹

Taamatuttaa Ombudsmandip misissuinerata takutippaa, kommunit meeqqap inissinneqarnerani angerlarteqqinneqarneranullu atasumik inatsisitigut piumasarineqartutut oqaloqateqartarnissanut pikkorippallaanngitsut. Tamanna pitsaanngilluinnarpoq, pingaaruteqarporlu, uagut Inatsisartut tungaanniit tamanna pillugu kommuninut sakkortuumik qisuariarnissarput.

Suliassat suliarineqartarnerannut inatsit ukiut 25-vit sinnerlugit atuutereerpoq, malittarisassani ajornaannerpaanut tunngaviusunullu ilaalluni. Taamaattumik Demokraatit paasiuminaatsippaat, taassuma kommuneni soq naammattumik malinneqartannginnera. Taamaattumillu Demokraatit sakkortuumik Naalakkersuisut kajumissaarniarpaat kommuninut attaveqaqqullugit qulakkeerniarlugu, pissutsit isornaatillit taakku erngerlutik aaqqinneqarnissaat.

Ernumanarpoq, sammisami tassani allanngortoqarsimaneranik takusaqarsinnaannginnerput.

Taamatut oqaaseqaateqarluta Ombudsmandip 2021-imut nalunaarussiaa tusaatissattut tiguarput neriutugalugu, nalunaarussiaq aammalu Ombudsmandip qanittukkut misissuinerajornartorsiutit taakkartorneqartut aaqqinnissaannut atorineqassasoq taamaasilluni, innuttaasut inatsisitigut illersorneqarnerat qaffaaffigineqarniassamat.

¹ <https://www.ombudsmandi.gl/nutaarsiassat/2022/undersoegelse-af-sager-om-anbringelse-og-hjemgivelse-af-boern-og-unge>